

LES VEYES

F. C'ment qu'te vais ?

V. I vais, i vais : qu'i vîns véye

F. Et peus moi aito, nos n'poyans pe aidé d'moéraie djûenes.

V. Le tot, ç'ât d'être véye po in grant temps.

F. Ç'ât lai v'lantè di Bon Dûe.

V. V'ni véye, c'était âchi le tieûsain d'nos véyes dgens.

F. Oh âye, mains d'ci temps-li, an n'se soingnait pe aich'bîn qu'mit'naint

V. Te me fais è rire, i â trovè, graiy'nè poi mon airrie, airrie grant'père enne r'çatte d'élixir de grante vétçhaince !

F. T'l'és bîn voidgè â moins ? Ç'ât cré bîn c'qu'è nos fârait

V. Te lai veus ? I t'lai veus bèyie tot comptant, mains i ne sais s'te veus trouaie in aipotçhaire qu'euche encoé ces ingrédients-li dains sai boutiçe !...

F. Dis aidé, i seus tote araye po l'oyi.

V. d'l'aloès socrotin, enne once in gros,

d'lai gentiane, in gros,

d'l'agaric blanc femelle, in gros,

di safran di yeuvant, in gros,

d'lai zédoaire, in gros,

d'lai thériaque, in gros.

Te botes tot çoli dains in potat, laivoù qu't'és voichè in litre de boëne gotte. Te léches infusaie trâs s'mainnes-in mois en r'muant lai sâce tos les djoués, aiprès te peux ècmencie è en boëre.

F. Te crais qu'èl en fât brâment boëre ? Et peus c'te thériaque, qu'ât-ce que ç'ât po d'lai podre de perlimpinpin ? C'n'ât pe di poûejon â moins ?

V. Mai poûere dgen, i n'en sais ran, i muse que c'n'ât pe di poûejon, è n'airait pe sai piaice dains l'élixir de grante vétçhaince. Aivô di poûejon t'airôs bîntôt fait d'virie l'airme è gâtche.

F. Ton airrie, airrie grant père, n'é pe pris fâte de graiy'naie c'ment qu'ès faint adjed'heû « è boëre aivô modérâtion ».

V. Oh nâni, t'sais bîn c'ment qu'ès dyînt nos dgens tiaind qu'ès djâsînt d'ci vîn di Jura « pus qu'an en boét, pus qu'an se tînt drèt » qu'an en boyeuche po ou prou es diyînt achi c'que pèse le cô pèse le dos .

F. Te coégnas quéqu'un qu'en euche fait eûsaidge de c't'élixir ?

V. Oh nenâ, mains i âi oyi dire que c'tu que l'aivait éprouvè était v'ni è cent tiaitre ans.

F. Eh bîn ç'ât tot vu, nos n'ains pu qu'è trouaie tos ces ingrédients, cheûdre lai r'çatte, et peus nos botaie è treûyie l'élixir s'nos v'lans nos béyie enque quéques boënes années de vétçhaince.

V. Aimis Patoisants, se çoli vait dînche, vos n'èz pe fini d'oyi nos riôles, mâfri, se nos nos cajînt aivaint nos cent ans, vos v'lèz poyaie musaie que c't'élixir de grante vétçhaince, c'était di pissat de p'tét l'oûejé !....

F. En aittendaint, i vos peux dire que le moiyou des élixirs de grante vétçhaince et peus que ne fait pe de mâ è lai bouéche, eh bîn : « **ç'ât le patois** » !